



**Pujortartarneq nunatsinni peqqissutsimut annertuumik sunniutipiloqartaqisoq qanoq annikillisarnerusinnaanera pillugu apeqquteqaat aallaavingalugu siunnersuut.**

(Inatsisartunut ilaasorta q Aqqalu C. Jerimiassen, Atassut)

Inatsisartunut ilaasortap Aqqalu C. Jerimiassenip matuminnga pingaarutilimmik oqallisigisassanngortitsineranut qjanaq.

Demokraatinut peqqinneq tassaaginnangilaq inuit napparsimaleraangata nakorsaaneq. Pinaveersaartitsinermut, akisussaaffeqarnermut, inuillu sivisunerusumik aamma pitsaanerusumik inuunissaannik periarfissillugit sinaakutissiinissamut aamma tunngassuteqarpoq.

Pujortartarnermut tunngatillugu inuiaqatigiittut unneqqarittariaqarpugut. Inuit amerlavallaarujussuartut peqqissutsikkut eqqorneqartarput. Inuuneq sivikillisittarpaa. Peruluummik nappaateqalersitsisarpoq. Pujortartartullu ataasiakkaat kisimik eqqorneqaratik ilaqtat, meeqqat, peqqinnissaqarfillu aamma eqqorneqartarlutik.

Inersimasut taamak amerlatigisut ulluinnarni pujortartartillugit, inuusuttullu amerlavallaarujussuartut pujortartartillugit imalluunniit nikotinitortartillugit pujortartarneq ataasiakkaat kisimik ajornartorsiutigiunnaartarpaat. Inuiaqatigiinni unammillernartunngortarpoq. Pingaartumik pujortartarneq nalinginnaasutut isigalugu meeqqat peroriartortillugit ernumanartarpoq. Tamanna allanngortikkusukkutsigu, siusissumik aamma erseqqissumik iliuuseqassaagut.

Ilutigisaanik inuit namminneq aalajangiisinnaatitaanerat ataqqillugu tamanna eqqartussavarput. Pisortat innuttaasut inuunerinut akisussaaffimmik tigusillutik inuiaqatigiunissarput Demokraatit kissaatiginnilaat. Nammineq peqqissutsip paarinissaa inuit namminneq aamma akisussaaffigaat. Suna tamarmi inatsisiliarineqarsinnaangilaq, inuillu ataasiakkaat toqqagaat pingaaruteqarpoq.

Kisianni inuiaqatigiit pitsaanerusunik sinaakutissiitillugit nammineq akisussaaffimmik tigusinissaq ajornanginnerulersarpoq. Pujortartarunnaarusukkaanni ikiortissaqassaaq. Pujortartarunnaarnissamik neqeroorutit, oqaloqateqarsinnaaneq, tapersorneqarsinnaaneq, ikiorserneqarsinnaanerlu ajornanginnerussapput, aamma illoqarfiit anginerit avataanni. Pujortartarunnaarusukkaanni ikiorserneqarnissaq ajornassangilaq.

Meeqqanut, inuusuttunullu aamma ersarissaagut. Pinngitsuuisinnaanermut usserneqassanngillat. Tupa, nikotini nalinginnaasutut aamma uloriananngitsutut misigissanngilaat. Tassani inersimasuusugut immikkut akisussaaffeqarpugut. Maligassiuillu arnerussaagut, tupalu aamma nikotini timimut aamma



siunissamut ajoqusisartoq ersarissumik oqarsinnaasariaqarluta.

Suliniut siusissumik, allaat naartuup inunngunnginnerani aallartittariaqarneranik Naalakkersuisut oqaaseqarnerat Demokraatit aamma maluginiarpaat. Naartooq nammineq aalajangiisinnaangilaq. Tamanna pillugu meeqqat tupamik, aangajaarniutinillu allanik ajoquserneqarnissaannut illersussallugit inuiaqatigiittut immikkut akisussaaffeqarpugut.

Oqallinneq manna tikkuartuilluni pissangilaq. Pujortartortorpassuit nalunngilaat pujortartarneq ulorianartuusoq. Amerlasuut aamma pujortartarunnaarusupput. Tamanna pillugu inuit ataqqillugit, ikiorlugillu pissavagut. Nikanarsarnagit. Kisianni aamma inuit peqqissusaat pillugu anguniagaqarnissaput merserissangilarput.

Tamanna pillugu pujortartartut qanoq ikilisissinnaanerigut, pinaveersaartitsineq qanoq annertusarsinnaaneripput, inuillu amerlanerusut peqqinnarnerusumik inuuneqalernissaannut qanoq ikiorsinnaanerigut pillugit pitsaasumik, kinguneqartussamillu oqallinnissaq Demokraatit qilanaaraat.